



NEWSLETTER OLIMPIJSKOG KOMITETA BiH

No.4 septembar/
oktobar 2020



UVODNA RIJEČ PREDSJEDNIKA OK BiH

Dragi sportisti i sportski radnici,

Sa ponosom Vam predstavljamo četvrti Newsletter Olimpijskog komiteta BiH, u kome su istaknute mnogobrojne aktivnosti namijenjene sportistima, trenerima, menadžmentu sportskih strukovnih saveza BiH, kao i promociji olimpizma i olimpijskih vrijednosti u našem društvu.

Podržali smo naše mlade olimpijske nade, i uspješno smo okončali naš projekat podrške sportskim strukovnim savezima

BiH. Napredni kursevi menadžmenta u sportu su finalizirani, dok ćemo novu godinu dočekati sa dva nova EU projekta u realizaciji i u potpuno renoviranom prostoru Olimpijskog komiteta BiH koji će biti preuređen u multimedijalnu salu.

Mjesec oktobar će zasigurno ostaviti neizbrisiv trag i sjećanje na spektakularnu ceremoniju otvaranja Olimpijskog muzeja. Ova sada trajna Olimpijska ostavština će biti dostupna svim sportistima, sportskim radnicima, građanima Bosne i Hercegovine i svijeta.

Dragi prijatelji, možemo samo biti ponosni na realizaciju velikog broja aktivnosti i projekata u vremenu u kojem živimo. Trenutna situacija u svijetu je izuzetno složena, vlada neizvjesnost i nepovjerenje, a globalna slika se u velikoj mjeri reflektuje na sport. Upravo u ovakvim okolnostima nam je potrebnije više nego ikada zajedništvo i više nego ikad potrebne su nam univerzalne olimpijske vrijednosti prijateljstva, mira, poštovanja, tolerancije i razumijevanja. Okruženi velikim brojem izazova, trebamo ostati ono što jesmo - nevladina nezavisna organizacija i nastaviti se voditi principima transparentnosti i efikasnosti u radu vjerujući u svoje vrijednosti.

Prof.dr Izet Rađo
Predsjednik Olimpijskog komiteta BiH

OLIMPIJSKI MUZEJ



Danas ponovo potvrđujemo vrijednosti na kojima su sagrađeni najsvjetliji momenti naše olimpijske historije

Snaga Olimpijskih igara održanih 1984. godine je u njihovoj univerzalnosti, jer su baš ove Igre imale snagu da ujedine čovječanstvo i pored svih njegovih različitosti učine ga boljim i mirnijim mjestom za život.

U Sarajevu je 08. oktobra 2020. godine upriličena svečana ceremonija na kojoj je nakon 25 godina sportistima, građanima Bosne i Hercegovine i svijeta svoja vrata otvorio obnovljeni Olimpijski muzej. Tim povodom mnogobrojnim zvanicama obratio se prof. dr Izet Rađo, predsjednik Olimpijskog komiteta BiH, čiji govor prenosimo u cijelosti:

Your Serene Highness Prince Albert II,
Poštovani predstavnici Države Bosne i Hercegovine,
Cijenjeni gradonačelnice Grada Sarajeva, gospodine Skaka

Dragi sportisti, treneri, dame i gospodo,
Danas je poseban dan, dan kada ponovo potvrđujemo vrijednosti na kojima su sagrađeni najsvjetliji momenti naše olimpijske historije. Historije koja je pokazala čitavom svijetu da možemo organizovati najvažniju smotru radosti, mira, zajedništva i tolerancije.

Snaga Olimpijskih igara održanih 1984. godine je u njihovoj univerzalnosti, jer su baš ove Igre imale snagu da ujedine čovječanstvo i pored svih njegovih različitosti učine ga boljim i mirnijim mjestom za život.

Istom tom snagom odisao je i EYOF 2019 Sarajevo i Istočno Sarajevo, koji je bio odraz naših najboljih vrijednosti na djelu.

Olimpijski duh je trajni eliksir krila mladosti, novih susreta i postignuća, medalja koje su motivacija za istrajnost i vjera da je sport naš najbolji prijatelj.

Pierre de Coubertin je rekao „Olimpijske igre su hodočašće ka prošlosti i vjera u budućnost“.

Upravo to predstavlja Olimpijski muzej.

Muzej će novim generacijama pružiti nadu za bolju budućnost kroz lekcije iz naše sjajne olimpijske prošlosti.



Zahvaljujemo se predsjedniku Međunarodnog olimpijskog komiteta dr Thomasu Bachu na toplim riječima koje nam je uputio u svom video obraćanju.

Želimo izraziti posebnu zahvalnost njegovom visočanstvu Princu Albertu II od Monaka, koji je danas ovdje kao predstavnik Predsjednika Međunarodnog olimpijskog komiteta, dr Thomasa Bacha, i cjelokupne Olimpijske porodice. U specifičnim okolnostima Princ Albert II nam je ukazao čast svojim dolaskom.



Ističem institucije bez kojih danas Olimpijski muzej ne bi bio otvoren, a to su Međunarodni olimpijski komitet, Evropski olimpijski komitet, Vijeće ministara Bosne i Hercegovine, Kanton Sarajevo i UNESCO, kao i vjerne sponzore Olimpijskog komiteta Bosne i Hercegovine.

Našu iskrenu zahvalnost dugujemo Gradu Sarajevu i gradonačelniku

Abdulahu Skaki što je prepoznao vrijednost ovog projekta, te nam pomogao da zajedničkim snagama nosimo naše olimpijske vrijednosti u budućnost i poklonimo ih svim građanima Bosne i Hercegovine i svijeta.

Dragi sportisti,
Drage dame i gospodo,
Dobrodošli u zgradu koja baštini najsvjetlije momente naše olimpijske historije.
Dobrodošli u Olimpijski muzej u Sarajevu.

Film o Olimpijskom muzeju u Sarajevu možete pogledati [ovdje](#).

PORUKA PREDSJEDNIKA MOK-a dr Thomas Bach-a uoči otvaranja obnovljene zgrade Olimpijskog muzeja u Sarajevu

Dragi predsjedniče Olimpijskog komiteta BiH,
dragi prijatelju prof. dr Izet Rađo,

Poštovani prijatelji,

Olimpijski muzej u Sarajevu otvara vrata za javnost nakon velikog renoviranja. Želim od srca čestitati Olimpijskoj porodici Bosne i Hercegovine. Ovim renoviranjem Olimpijski duh sija većim sjajem u Olimpijskom gradu Sarajevu, u Bosni i Hercegovini, i u cijeloj regiji.



Olimpijski duh je došao u Sarajevo 1984. godine. Te godine je vaš divni grad bio domaćin Zimskih olimpijskih igara. I danas se sjećam svoje posjete tim Olimpijskim igrama u svojstvu člana Komisije sportista MOK-a. Zahvalan sam na vašoj gostoljubivosti, i na vašoj savršenoj organizaciji Zimskih olimpijskih igara.

Novi i bolji Olimpijski muzej igra veliku ulogu u očuvanju sjećanja na ove nezaboravne Igre i na njihovo naslijeđe u budućnosti. Muzej prikazuje sportsku historiju Bosne i Hercegovine u svim svojim aspektima i cijeli spektar ljudskih emocija. To je mjesto za učenje, razmišljanje i uživanje. Ovdje će se osjetiti ponos i radost koju sportski uspjesi vaših sportista donose svim Bosancima i Hercegovcima, razmišljat će se o posljedicama rata koji je tragično zahvatio ovaj Olimpijski grad, ali će se učiti i o moći sporta u oblikovanju puta nade ka boljoj budućnosti.


Svoju zahvalnost upućujem Olimpijskom komitetu Bosne i Hercegovine, koji predvodi moj veliki prijatelj prof.dr Izet Rađo. Želim se zahvaliti Olimpijskom komitetu Bosne i Hercegovine, koji predvodi moj veliki prijatelj prof. dr Izet Rađo, zbog svega što radite u cilju promocije sporta i njegovih vrijednosti. Zahvaljujući vašoj posvećenosti Olimpijske vrijednosti izvrsnosti, prijateljstva, poštovanja i solidarnosti prisutne su u cijeloj državi a i šire. Stoga, u ime Međunarodnog olimpijskog komiteta, i u ime cijelog Olimpijskog pokreta, hvala vam što ste pouzdan član naše Olimpijske zajednice.

Iskreno Vam čestitamo!

Još jednom, od srca vam čestitam. Želim vam divnu proslavu i sve najbolje za budućnost.

Govor Predsjednika Bacha možete pogledati u cjelosti na sljedećem [linku](#).

UMJETNIČKA RADIONICA OLYMPIC LEGACY



U obnovljenom Olimpijskom muzeju u Sarajevu danas je okončana dvodnevna umjetnička radionica na kojoj je učestvovalo 40 talentovanih učenika, a koju je organizirao Olimpijski komitet BiH u suradnji sa Međunarodnim olimpijskim komitetom.

Radionicu je vodio Faris Ramadanović, akadamski grafičar, a u prvoj grupi 20 učenika iz Srednje škole primjenjenih umjetnosti pokazali su zavidna umjetnička ostvarenja na temu bogatog olimpijskog naslijeđa. Pobjednica, čija je umjetničko djelo proglašeno najboljim, je Emina Koso.

“Prvi put sam u Olimpijskom muzeju. Tema koju sam izabrala su stari bobovi zato što mi je djed stalno pričao kako ih je prodavao za vrijeme Olimpijade”, kazala je Koso, koja je svoj pobjednički rad poklonila Muzeju gdje će biti i izložen.

U drugoj grupi 20 učenika sarajevskih osnovnih škola, i to deset učenika iz Osnovne škole Safvet-beg Bašagić i deset učenika iz Osnovne škole Katoličkog školskog centra, također su slikali eksponate iz Muzeja.

Pogledajte i kratki [video](#) sa Umjetničke radionice.



DELEGACIJA ORGANIZATORA ZOI '84 U POSJETI OBNOVLJENOM OLIMPIJSKOM MUZEJU XIV ZOI '84

Olimpijski komitet Bosne i Hercegovine je pozvao visoke dužnosnike Organizacionog komiteta ZOI '84 da posjete novoizgrađeni Olimpijski muzej kako bi iskazao svoje poštovanje prema svima onima koji su dali svoj doprinos u organizaciji XIV Zimskih olimpijskih igara 1984. Delegacija organizatora ZOI '84 je bila predvođena Ahmedom Karabegovićem, generalnim sekretarom Organizacionog komiteta XIV ZOI '84.



Baštiniti Olimpijsko naslijeđe kao dio kulturnog naslijeđa Sarajeva i Bosne i Hercegovine, zasigurno podrazumijeva i odati počast ljudima bez čijeg vodstva i požrtvovanosti Sarajevska olimpijada ne bi bila proglašena kao najbolje organizovane Zimske olimpijske igre, prema riječima tadašnjeg Predsjednika Međunarodnog olimpijskog komiteta Juan Antonio Samaranch-a.

Uvažavajući velikane naše Olimpijske historije u obnovljenoj zgradi Olimpijskog muzeja u Sarajevu Olimpijski komitet BiH šalje poruku mladim naraštajima da bogatstvo naše olimpijske prošlosti treba da služi kao podstrek i vodilja u bolju budućnost svih građana Bosne i Hercegovine.

NJ. E. ERIK NELSON AMBASADOR SAD U BIH POSJETIO OLIMPIJSKI MUZEJ



Novootvorenu zgradu Olimpijskog muzeja posjetio je Nj. E. Erik Nelson Ambasador Sjedinjenih Američkih Država u BiH u pratnji Filipa Tatonija.

Ambasadora Nelsona su u Muzeju primili predsjednik Olimpijskog komiteta BiH prof.dr Izet Rađo, potpredsjednik Marijan Kvesić i kooptirani član Izvršnog komiteta u Predsjedništvu OK BiH prof. dr Milanko Mučibabić, generalni sekretar OK BiH dr.sci Said Fazlagić, a domaćin posjete je bio dugogodišnji

direktor Muzeja Edin Numankadić.

Ambasador Nelson nije krio oduševljenje Olimpijskim muzejom, te je čestitao Olimpijskom komitetu BiH na dugogodišnjem zalaganju za obnovu ove prelijepo građevine koja baštini sjećanja na ZOI „Sarajevo 1984“, te nedavno održani EYOF 2019 Sarajevo & Istočno Sarajevo.

AKTIVNOSTI OK BIH

Podrška mladim Olimpijskim nadama Bosne i Hercegovine



U prostorijama Olimpijskog komiteta BiH, 03. novembra 2020. godine upriličeno je potpisivanje jednogodišnjeg Ugovora o stipendiranju sa mladim bh. sportistima u okviru projekta Olimpijskog komiteta BiH koji je isključivo namijenjen perspektivnim i mladim sportistima uzrasta do 18. godina.

Mladim sportistima se obratio prof.dr Izet Rado, predsjednik OK BiH, naglasivši da se radi o simboličnoj pomoći Olimpijskog komiteta BiH, kao organizacije koja nije u obavezi da finansira bh. sport, i koja ovim putem šalje poruku da sve odgovorne institucije trebaju pružiti podršku mladim nadama bh. sporta.

Svakako je bitno imati u vidu da će se realizacijom ovakve vrste projekata povećati i šanse za kvalifikovanjem većeg broja sportista za nastup na predstojećim Olimpijskim igrama, kako tradicionalno na Olimpijske igre ne bi odlazili sportisti koji dolaze samo iz 2 ili 3 sportska saveza.

Predloženi mladi sportisti od strane Sportskih strukovnih saveta BiH će primati mjesečnu stipendiju na period od jedne godine (12 mjeseci), a to su sljedeći:

Amar Pašić - dizanje tegova
Nejla Kalača - dizanje tegova
Branko Tadić - judo
Hana Piralčić - judo
Nemanja Malešević - tenis
Asja Klačar - snowboard
Zara Husedžinović - umjetničko klizanje
Matej Rašić - streljaštvo

Apel OK BiH nadležnim institucijama



Izvršni odbor Olimpijskog komiteta BiH na 31. sjednici ponovo je razmatrao otvoreno pitanje u vezi sa nacionalnim penzijama za vrhunske sportiste iz Federacije BiH, a koji se nalaze u neravnopravnom položaju u odnosu na njihove kolege iz RS-a.


Naime, zaslužni sportisti, osvajači olimpijskih, svjetskih i evropskih medalja, koji su nastanjeni u RS-u, od 2007. godine primaju nacionalne sportske penzije, dok njihove kolege nastanjene u Federaciji BiH još nisu riješile taj status, ne primaju nikakve apanaže i teško žive, iako su neki od njih

igrali u istom klubu, u isto vrijeme i osvajali iste medalje.

OK BiH je dostavio apel nadležnim institucijama, Ministarstvu civilnih poslova BiH, Vijeću ministara BiH te i Vladi Federacije BiH da iznađu način i izbalansiraju status zaslužnih sportista iz Federacije BiH sa statusom koji imaju sportisti u drugom entitetu i riješe ovaj dugogodišnji problem, kao što su riješile nadležne institucije u RS-u.

Olimpijski komitet BiH još jednom podržao najbolje sportiste

Olimpijski komitet BiH dodijelit će Amelu Tuki, Larisi Cerić i Mesudu Pezeru, najboljim bh. sportistima koji su se kvalifikovali za Olimpijske igre u Tokiju, po dodatnih 15.000 KM.



Ovo je još jedan doprinos Olimpijskog komiteta BiH u vrijeme pandemije COVID-19, kako bi najbolji bh. sportisti mogli trenirati u kampovima i pokriti druge troškove vezane za njihov generalni trenažni proces, a sve sa ciljem što boljeg nastupa na Olimpijskim igrama Tokyo 2021.

“Zahvaljujem se Olimpijskom komitetu BiH na bitnoj podršci koju nam pružaju u ovom periodu kako bi se što bolje spremili za Olimpijske igre koje će se održati naredne godine. To je zaista nešto jako pozitivno i jako veliko za nas sportiste i svakako će nam njihova podrška dosta olakšati pripreme”, kazao je Amel Tuka, koji je svim sportistima poželio sreću i mnogo sportskih uspjeha te da se što bolje sprema za Olimpijske igre Tokyo 2020 kako bi Bosnu i Hercegovinu predstavili u što boljem svjetlu.

Na sljedećem [linku](#) pogledajte izjavu Amel Tuke.

NJ.E. Ambasador Johann Sattler u posjeti OK BiH



Šef delegacije Evropske unije i specijalni predstavnik EU, NJ.E. Ambasador Johann Sattler u posjeti Olimpijskom komitetu Bosne i Hercegovine.

Teme sastanka bile su struktura i rad Olimpijskog komiteta BiH, kao i mnogobrojne aktivnosti koje realizira malobrojna administracija, sa posebnim osvrtom na EU projekte.

Predsjednik OK BiH, prof.dr Izet Rado se u ime sportista zahvalio ambasadoru Sattleru na angažmanu u očuvanju okoliša i njegovoj ličnoj borbi protiv zagađenosti zraka, kao jednog od osnovnih uvjeta za kvalitetno bavljenje sportom.

Potpredsjednici OK BiH i generalni sekretar su nadalje upoznali Ambasadora o realiziranim projektima iz oblasti podrške sportistima, sportskim savezima, edukaciji, humanitarnim radom, te i drugim kapitalnim projektima od kojih se ističu organizacija EYOF 2019 Sarajevo i Istočno Sarajevo i rekonstrukcija zgrade Olimpijskog muzeja.

Prof.dr Zoran Milošević u posjeti Olimpijskom muzeju u Sarajevu

Među mnogobrojnim zvaničnicima i dužnosnicima, Olimpijski muzej u Sarajevu je posjetio i prof.dr Zoran Milošević, pokrajinski sekretar za visoko obrazovanje i naučnoistraživačku djelatnost, Autonomne pokrajine Vojvodine, Republika Srbija.

Prisjetimo se da je prof. Milošević ugostio EYOF 2019 Sarajevo i Istočno Sarajevo delegaciju u Novom Sadu, iskazavši bezuvjetnu podršku u realizaciji ovog velikog događaja.



OK BiH specijalni partner u realizaciji projekta "Označavanje staze na Bjelašnici"



Projekat "Označavanje staze na Bjelašnici" sprovodi udruženje Ambasadori olimpijskih planina, a čiji je glavni cilj markacija planinarskih staza, popularnih među šetačima, planinarima i biciklistima.

U sam proces realizacije projekta bit će uključena djeca i omladina kako bi se dodatno educirali o važnosti i značaju prirode i stvorili naviku za brigu o okolišu.

Održan Tehnički kurs za trenere u streljaštvu (D licenca)

U Trebinju je 17.-20.9.2020. godine u organizaciji Olimpijskog komiteta BiH, ISSF-a i Streljačkog saveza BiH održan tehnički kurs za trenere u streljaštvu (D licenca).

Događaj su otvorili generalni sekretar OK BiH, dr sci. Said Fazlagić, gđin Neven Rašić, član Izvršnog komiteta OK BiH, gđin. Momčilo Bodiroga, predsjednik UO SSBiH i gđa. Aida Hunčec-Pita, generalni sekretar SSBiH, te zvaničnici iz Trebinja: gđa. Slađa Skočajić, zamjenica gradonačelnika; gđin. Mitar Mrdić, saradnik za sport Grada Trebinja; gđin. Velibor Brnjoš, generalni sekretar Sportskog društva Leotar.



Kurs na kojem je učestvovalo 30 trenera iz Streljačkog saveza BiH i dva entitetska saveza invalida su vodili licencirani predavači ISSFa, gđin Goran Maksimović (SRB) za disciplinu zračna puška i Marko Sokić (SRB) za disciplinu zračni pištolj.

Završen projekat Team Support Grant četverogodišnje saradnje MOK-a, OK BiH i Ragbi saveza Bosne i Hercegovine

Završnim kampom ragbi reprezentacije Bosne i Hercegovine u ragbiju 7s održanim u Bihaću od 24. do 27. krunisana je četverogodišnja saradnja OK BiH i Rugby saveza BiH kroz projekat Međunarodnog olimpijskog komiteta –Team Support Grant.

Rezultati koje Ragbi savez Bosne i Hercegovine postiže u posljednjim godinama sa svim nacionalnim selekcijama nisu prošli nezapaženi od strane Olimpijskog komiteta Bosne i Hercegovine posebno rezultati muške seniorske reprezentacije koja je u proteklom periodu napravila veliki pomak na World Rugby ranking listi, te sa 90. mjesta napravila skok na 68. mjesto.



Ujedno muška reprezentacija je u protekla dva ciklusa Evropskog prvenstva nacija u kvalifikacijama oba puta osvojila prvo mjesto u svojim skupinama, te dva puta zaredom promovisana u veći rang natjecanja.

Olimpijski komitet BiH je posredstvom fonda solidarnosti MOK-a obezbjedio sredstva u iznosu od 60.000 USD na 4 godine za Ragbi saveze Bosne i Hercegovine koji su utrošeni za niz organizacija kampova visokih performansi, pripremnih turnira te odlazaka na Evropska prvenstva u ragbiju VII.

PODRŠKA SPORTSKIM SAVEZIMA BIH

Uspješno finaliziran projekat Podrške sportskim savezima BiH

Dodjelom opreme preostalim sportskim savezima BiH uspješno je finaliziran projekat Podrške sportskim savezima.

Oprema je dodijeljena:


- Badminton savez BiH
- Biciklistički savez BiH
- Kajakaški savez BiH
- Plivački savez BiH
- Skeleton savez BiH
- Skijaški savez BiH
- Vaterpolo savez BiH



Završeni Napredni kursevi menadžmenta u sportu

Dana 4. novembra 2020. godine održan je posljednji modul, tj, odbrane studija slučaja polaznika “Naprednih kurseva menadžmenta u sportu”.

Radi se o edukativnom programu koji je osmišljen od strane Međunarodnog olimpijskog komiteta (MOK) i usmjeren na unapređenje rada sportskih organizacija sa ciljem usavršavanja vještina i kompetencija ljudskih potencijala, ali i stvaranja „društva znanja“ koje će uspostaviti jake veze među menadžerima iz različitih sportova.



U šest mjeseci koliko je trajao program “Naprednih kurseva menadžmenta u sportu” polaznici su imali priliku da slušaju predavanja iz oblasti organizacije i upravljanja, strateškog menadžmenta, upravljanja ljudskim potencijalima, finansijama, marketinga i komunikacija, projekt menadžmenta i organizacije velikih sportskih događaja.

Nastava je bila teoretsko-praktičnog karaktera, a učesnici su znanje stečeno na teoretskom dijelu nastave prezentirali u vidu realnih studija slučaja prenoseći iskustva rada u svojim organizacijama.

Edukaciju je uspješno završilo 16 polaznika iz bosanskohercegovačkih sportskih organizacija među kojima je i naša proslavljena košarkašica Razija Mujanović.

Finalne radove su prezentirali sljedeći polaznici kursa:

- Enes Peštek - Bokserski savez BiH
- Ademir Rašić - Gimnastički savez BiH
- Azur Kuduzović - Plivački savez BiH
- Nijaz Šahinović - Streljački savez BiH
- Vedran Ćubela - Taekwondo savez BiH
- Samir Sarić - Taekwondo savez BiH
- Senad Hadžimešić - Teniski savez BiH
- Brane Srdić - Badminton savez BiH
- Ćena Arifović - Educational Center P.S. Maya
- Razija Mujanović - Košarkaški savez
- Kornelija Leko - IK OKBiH
- Selma Karčić - Paraolimpijski komitet BiH
- Amela Bajrektarević - FASTO
- Ajša Alić - FASTO
- Hana Novalija - FASTO
- Anel Imamović - Košarkaški savez BiH

Sastanak EOK EU komisije



Kao član EOC EU komisije, prof. dr. Izet Rado, Predsjednik OK BiH učestvovao je u online sastanku koji se održao 06.10.2020. godine.

Nakon uvodnog govora v.d. predsjednika EOC-a, gosp. Nielsa Nygaarda koji se osvrnuo na trenutnu situaciju u svijetu vezano za COVID 19 i generalnu poziciju sporta, na sastanku se razgovaralo o aktuelnim temama, kao što je organizacija online konferencije “Budućnost sporta u Evropi”, a koja je planirana za 17. novembar

2020. godine. Također, EOC EU komisija podstiče članice da razgovaraju sa državnim organima vlasti kako bi se više sredstava izdvojilo za sport i oporavak od COVID 19 krize na državnom nivou dok će EOC EU komisija razmotriti načine na koji se može pomoći sportistima da lakše putuju, kako bi se za sada rigidne restriktivne mjere ublažile za sportiste i kako bi mogli jednostavnije odlaziti na kvalifikaciona takmičenja za OI i druga takmičenja iz kalendara internacionalnih federacija.

U nastavku sastanka govorilo se o novoj inicijativi “Green Deal” u sklopu koje Evropska unija planira izdvojiti značajna sredstva za “Zeleni” sport, te i o novom Erasmus + sport programu koji pruža nove mogućnosti i za države koje nisu članice Evropske unije, kao što su države Zapadnog Balkana.

Sastanak NOK-ova Centralne i Jugoistočne Evrope

Na poziv Olimpijskog komiteta Slovenije, dr. sci Said Fazlagić, generalni sekretar OK BiH prisustvovao sastanku NOK-ova Centralne i Jugoistočne Evrope koji je održan od 19. do 21. septembra 2020. godine u Ljubljani, Slovenija.

Sastanak je počeo minutom šutnje za predsjednika EOK i predsjednika Grupe NOK-ova Centralne i Jugoistočne Evrope gosp. Janeza Kocijančiča kao i gledanjem mini filma o liku i djelu gosp. Kocijančiča.

Sumirajući diskusije sa sastanka, u uvodnom dijelu Predsjednik grupe Andrej Krasnicki iznio niz problema sa kojima se susreću članice EOK-a sa pojavom pandemije i odgađanjem Olimpijskih igara.

Na zahtjev za priključenje Grupi predsjednika NOK-a Ukraine Sergeja Bubke, Ukrajina je postala nova članica Grupe NOK-ova Centralne i Jugoistočne Evrope.



Nakon sastanka svi učesnici su imali priliku odati počast preminulom predsjedniku EOK-a gospodinu Janezu Kocijančiču odlaskom na njegov grob.

Prof.dr. Branislav Crnogorac, član IK OK BiH dobitnik Ordena Izlazećeg sunca



Prof.dr. Branislav Crnogorac, član Izvršnog komiteta Olimpijskog komiteta Bosne i Hercegovine dobitnik je ordena Izlazećeg sunca, zlatnih i srebrenih zraka. Orden Izlazećeg sunca, je orden kojeg dodjeljuje Japanska vlada, a osnovao ga je Car Meiji 1875. godine. Zrake izlazećeg sunca, na osnovu kojih je i dizajniran orden, simbolično prikazuju moć i energiju izlazećeg sunca.

Za Olimpijski komitet Bosne i Hercegovine, profesor Crnogorac je poručio: "Iznimna mi je čast biti dobitnik ove prestižne nagrade, koju dodjeljuje Car Japana putem Vlade Japana onim ljudima koji su iz određenih oblasti napravili značajan pomak.


Stoga, u mom slučaju prepoznati su napori koje sam uložio u popularizaciju judo sporta u BiH. Moj dugogodišnji staž u sportu je pobudio posebno interesovanje. Naime, ja sam već 55 godina aktivno prisutan u sportu, a od toga 45 godina sam trener, i naravno kroz moje škole i akademije su prošli mnogi sportisti, vrhunski i najtrofejniji sportisti. Od velikog interesovanja je i moj doprinos na prijateljstvu između BiH i Japana, gdje sam na sebi osoben način i uz dostupna sredstva, vrlo često kroz takmičenja, organizovao i aktivno radio na promociji japanske kulture. Stoga, pored rezultata u judo sportu prepoznat je i moj doprinos na unaprijeđenju razumijevanja između BiH i Japana, a i to je sve na određen način krunisano ovim velikim priznanjem. Ja sam jedan od najsretnijih ljudi na planeti i ovakvo priznanje se dobiva jednom u životu".

Olimpijski komitet Bosne i Hercegovine šalje iskrene čestitke prof.dr. Crnogorcu, članu Izvršnog komiteta OK BiH na ovom prestižnom priznanju.

Multimedijalna sala OK BiH - Renoviranje prostorije OK BiH nakon preseljena muzejske postavke u obnovljeni Olimpijski muzej

Nakon završetka rekonstrukcije stare zgrade Olimpijskog muzeja, iz prostorija OK BiH izmješteni su postameni i kulturno-umjetnička postavka u originalnu, obnovljenu zgradu.

Sala koja je godinama čuvala olimpijsko naslijeđe zahtijevala je potpuno preuređenje. S tim u vezi, OK BiH je pristupio projektu adaptacije kako bi ovaj prostor preuredio u multifunkcionalnu konferencijsku salu za potrebe Sportskih strukovnih saveza i edukacije.



EU PROJEKTI



Projekat "PARAINSPIRED!" značajno unaprijedio parasport u BiH i Srbiji

Glavni cilj projekta, koji su realizirali Olimpijski komitet BiH, Pokrajinski sekretarijat za sport i omladinu Republike Srbije, Fond „Evropski poslovi” AP Vojvodine i Opština Indija, bio je podrška društvenoj integraciji kroz podsticanje održivih sportskih razmjena, a kako bi se povećalo učešće osoba sa invaliditetom u sportskim aktivnostima u pograničnom području Srbije i Bosne i Hercegovine.

U sklopu projekta realizirane su brojne aktivnosti, a između ostalog, parasportisti Srbije i BiH bogatiji su za kombi vozila opremljena prigodnom rampom, sportskom opremom za stoni tenis, košarku u kolicima i sjedeću odbojku. Također, organizovani su različiti događaji usmjereni na popularizaciju paraolimpijskog sporta i promociju sporta za osobe sa invaliditetom kao što su promotivni treninzi, simpozijumi i egzibicioni meč.

Projekat "Parainspired", također, prvi put omogućio je sistemsko i sveobuhvatno istraživanje, kao i analizu stanja u oblasti parasporta u BiH. Rezultat ovog istraživanja su uspješno sprovedene mnogobrojne edukacije, a publikovan je i „Priručnik za parasport“ koji je namijenjen trenerima i parasportistima kao svojevrsna vodilja za buduće projekte i korake naprijed u razvoju socijalne integracije osoba sa invaliditetom.

Učesnicima konferencije, parasportistima i drugim zainteresiranim sportskim radnicima iz obje države prigodnim predavanjima iz oblasti parasporta na završnoj konferenciji obratili su se prof. dr Ekrem Čolakhodžić, prof. dr Ifet Mahmutović i Irhad Bušatlić.

Finalni video projekta pogledajte [ovdje](#).

Evropska sedmica sporta 2020



“Evropska sedmica sporta ima za cilj da unaprijedi i pospješi bavljenje sportom među širom populacijom. Olimpijski komitet Bosne i Hercegovine, u saradnji sa sportskim savezima i klubovima već treću godinu obilježava Evropsku sedmicu sporta u BiH, uz promociju sportova sa kojima je bh. javnost manje upoznata”, rekao je g. Mirsad Ćatić, Ambasador Evropske sedmice sporta OK BiH.

Olimpijski komitet Bosne i Hercegovine, kao član koordinacijskog tijela BiH za Evropsku sedmicu sporta, već treću godinu organizuje niz sportskih događaja sa ciljem obilježavanja Evropske sedmice

sporta u Bosni i Hercegovini.

Evropska sedmica sporta se ove godine obilježila u saradnji sa Golf asocijacijom BiH, Klubom sportova na ledu „Unity“, Savezom klizačkih sportova BiH, Centrom Skenderija, i Streljačkim klubom Sarajevo.



Pogledajte kratak video Evropske sedmice sporta 2020 [ovdje](#).

Muzejske priče



Olimpijski komitet BiH je u sklopu projekta “Muzejske priče”, čiji je koordinator Grad Sarajevo u srijedu, 21.10.2020. godine otvorio izložbu “ZOI’84” u Muzeju Prijepolje.

Izložene eksponate čine Olimpijski plakati Ismara Mujezinovića, koji prikazuju sportove sa sarajevske Olimpijade, te karikature Hasana Fazlića, na kojima su naslikani visoki zvaničnici tadašnjeg Organizacionog odbora, Gradske uprave i Međunarodnog olimpijskog komiteta.



Čast nam je i zadovoljstvo da je našu putujuću izložbu u Muzeju u Prijepolju posjetio legendarni Vlade Divac.



SPORTSKI SAVEZI BIH

Stonoteniski savez



Zahvalnost STS BiH za podršku od strane Olimpijskog Komiteta Bosne i Hercegovine.

Budući da se po prvi put priključujemo vašem Newsletter-u br. 4, dostavom aktuelnih informacija, prije svega želim da izrazim zahvalnost Stonoteniskog saveza Bosne i Hercegovine (STS BiH) i njenog Upravnog odbora čiji sam Predsjednik. Provedba ovakvog Projekta od strane OK BiH je bila neophodna za sve strukovne odnosno sportske saveze.

U nedostatku Sportskog Saveza u BiH u punom kapacitetu, uz vašu nesebičnu koordinaciju i podršku, strukovni odnosno sportski savezi imaju priliku da se bolje upoznaju, međusobno surađuju i učestvuju u zajedničkim projektima edukacije, unapređenja i razvoja sporta Bosne i Hercegovine. Želim da istaknem Vašu podršku Sportskim strukovnim savezima u opremanju i standardizaciji odnosno unifikaciji izgleda BIH sportista i reprezentacija na međunarodnim takmičenjima.

Uz vašu pomoć ostvarujemo bolju koordinaciju sa Evropskom (ETTU) i Svjetskom (ITTF) stonoteniskom asocijacijom/federacijom, posebno u dijelu edukacije kroz Solidarity Programme.



U ovim teškim vremenima za sport u cijelini u više navrata OK BiH se u ime svih strukovnih saveza obraćao institucijama na državnoj, entitetskoj i kantonalnoj razini svojim apelima za podršku sporta, sportista, klubova i sportskih strukovnih saveza, a posebno u vrijeme pandemije COVID-19. Vaš poslednji apel nadležnim institucijama za sport od 21.09.2020. godine je dokaz da ne odustajete od podrške i pomoće na čemu vam je Stonoteniski Savez BiH veoma zahvalan.



Na kraju koristim priliku da se ispred STS BIH zahvalim Predsjedniku OKBiH, Potpredsjednicima, Generalnom sekretaru i cjelokupnom osoblju.

SPORTSKI SAVEZI BIH

Sankaški savez BiH



Naš najbolji sankoš junior Mirza Nikolajev i ove takmičarske sezone ima izvrsne rezultate u sezoni 2019/2020.

Mirza je plasiran u top 10 najboljih sankoša juniora u svijetu i Evropi.

U generalnom poretku Svjetskog juniorskog kupa Mirza zauzima 9. (deveto) mjesto sa osvojenih 172 boda.

Na 41 Europskom prvenstvu Mirza je plasiran na 8 mjesto.

Na Svjetskom juniorskom prvenstvu Mirza je zauzeo 15. mjesto.

Golf asocijacija BiH

Treće Juniorsko Prvenstvo Bosne i Hercegovine u golfu

Na prelijepom sarajevskom golf terenu VF-a odigralo se 3. Juniorsko Prvenstvo Bosne i Hercegovine u golfu. Po prvi put se juniorsko prvenstvo igralo dva dana i po 18 rupa što će doprinijeti kvalitetnijem radu sa najmlađim kategorijama. Učestvovalo je 12 juniora i 3 juniorke.

Najbolja od juniorki na ovom Prvenstvu je Zana Mujanović sa 248 udaraca.



Kod juniora malo uzbudljivija situacija. U igri za osvajanje juniorskog prvenstva je bilo 8 juniora nakon prvog dana. Najviše znanja pokazao je prošlogodišnji šampion Tarik Đerzić koji je odigrao 189 udaraca i ponovio scenario iz 2019. godine kada je za samo jedan udarac bio bolji od svog klupskog kolege Tarika Mujanovića.

Dok su stariji igrali Prvenstvo na golf terenu VF-a upriličena je igraona za najmlađe golfere iz škola golfa u Sarajevu i Zavidovićima i iduće godine očekujemo ove mlade da igraju Prvenstvo.

Nagrade najboljima uručili su predsjednik Golf Saveza BiH Jasmin Selmanagić, predsjednik GK Sarajevo Sead Balić i predsjednik PGA BiH Dejan Šaran.

Čestitke najboljima i svim učesnicima ovog 3. Juniorskog Prvenstva Bosne i Hercegovine u golfu.

Savez dizača tegova BiH



Internacionalno Prvenstvo Open Bosnia i River SAVA

Prema Covid-19 pravilima održano je Internacionalno Prvenstvo Open Bosnia i River SAVA (jedina prvenstva sa Svjetskog kalendara koji su održani nakon 1. marta do kraja godine) i Državnog Prvenstva u konkurenciji U12, U15, U17, U20, U23, prvenstva BIH za studente, veterane i osobe sa invaliditetom, kao i Prvenstvo Kantona Sarajevo u konkurenciji U12, U15, U17, U20, U23, prvenstva BIH za Studente, Veterane i Osobe sa invaliditetom.

Plasman River SAVA Kupa:

1. Bosna i Hercegovina, 17 zlatnih medalja
2. Hrvatska: 13 zlatnih medalja
3. Srbija: 8 zlatnih medalja

Plasman Open Bosnia Cupa:

1. Bosna i Hercegovina 10 zlatnih medalja
2. Turska 8 zlatnih medalja
2. Poljska 8 zlatnih medalja
4. Srbija 7 zlatnih medalja
4. Hrvatska 7 zlatnih medalja
6. Rumunija 3 zlatnih medalja
7. Kosovo 2 zlatne medalje
8. Albanija 1 zlatna medalja
9. Texas 1 srebrna medalja

Ekipni plasman Prvenstva BIH u konkurencijama U12, U15, U17, U20, U23, Studenti, Veterani i Osobe sa Invaliditetom:

1. Bosna 19 zlatnih medalja
2. Željezničar 14 zlatnih medalja
3. Sidro 11 zlatnih medalja
4. IsANEH-ZB 8 zlatnih medalja
5. Neretva 1 zlatna medalja

Intervju sa **Lejlom Tanović**



OK BiH: *Lejla, upravo smo neki dan saznali predivnu vijest, osvojili ste istorijsko 8. mjesto na Svjetskom prvenstvu u maratonu. Šta za Vas znači ovaj historijski rezultat?*

Lejla Tanović: Moram priznati da sam još uvijek pod utiscima, ovo je ogromno postignuće za mene lično ali i za biciklizam u Bosni i Hercegovini. Zaista je nevjerovatno da se cilj za koji sam sa trenerom radila 10 godina napokon ostvario. Sjajan je osjećaj biti u samom vrhu svjetskom biciklizma, a pogotovo kada sam tokom takmičenja vidjela da se sigurno mogu boriti za medalju. Ove godine sam pokazala veliki napredak na UCI listi i sigurno da kvalitetom zaslužujem odlazak na Olimpijske igre, sada kao reprezentacija moramo raditi više da ispunimo normu.

OKBiH: *Vi ste dio stipendista Olimpijskog komiteta Bosne i Hercegovine. Koliko je važno da sistemski pružamo podršku našim sportisima?*

LT: Sistemska podrška, a koju imamo od Olimpijskog komiteta Bosne i Hercegovine, od krucijalne je važnosti za postizanje vrhunskih rezultata na međunarodnom nivou. Svakako da i druge institucije trebaju slijediti primjer Olimpijskog komiteta, te pružiti podršku istaknutim sportistima. Sigurno da bi uz bolju podršku ostalih institucija u BiH dovelo do pozitivnih promjena i većeg broja osvojenih medalja naših sportista na najprestižnijim takmičenjima.



OK BiH: *Lejla, koliko često trenirate i šta su planovi za budućnost?*




LT: Moj trenažni ciklus zavisi od perioda godine te da li je takmičarski period u sezoni. Pretežno treniram šest puta sedmično, dok jedan dan u sedmici je planiran za potpuni odmor. U prosjeku dnevno provedem između 4 i 6 sati treninga na biciklu, dok najobimnije sedmice znaju imati i do 28 sati treninga. Moji planovi su nastup na svjetskim kupovima u Italiji i Češkoj i na Svjetskom prvenstvu u Turskoj što će biti ujedno i moje posljednje takmičenje za ovu sezonu. Jedan od glavnih ciljeva za mene i mog trenera je plasman u top 15 na Svjetskom prvenstvu.

OK BiH: *Što Vas motiviše i šta bi ste poručili mladim sportistima?*

LT: Moja najveća motivacija je odlazak na OI u Tokio 2021 godine, a svakodnevnu motivaciju crpim iz stalnog napretka koji vidim na treningu i na takmičenjima. Mladim sportistima bih poručila da se okruže pozitivnim ljudima i da ne odustaju od svojih ciljeva, jer što su ciljevi veći to je više vremena potrebno da bi se oni i ostvarili.



ZAVIRITE U DRUŠTVENE MREŽE OK BiH (klikom na sliku)



Pratite nas na društvenim mrežama:
(klikom na ikone)



©2020. Olimpijski komitet Bosne i Hercegovine. Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.

